

16. janúar 1974.

3

Nr. 3.

AUGLÝSING

um staðfesting forseta Íslands á breytingu á reglugerð fyrir Háskóla Íslands, nr. 76/1958, með áorðnum breytingum.

Forseti Íslands féllst hinn 16. janúar 1974 á tillögu menntamálaráðherra um að staðfesta eftirfarandi breyting á reglugerð nr. 76 17. júní 1958 fyrir Háskóla Íslands, með áorðnum breytingum:

1. gr.

42. gr. f., aftur að 10. tölulið, orðist svo:

f. Kennslugreinar.

Kennslan í hverri námsgrein er miðuð við, að stúdent fái yfirferð yfir öll aðalatriði hennar áður en hann skráir sig til prófs í greininni. Kennslan fer fram í fyrirlestrum, samtölum, umræðuhópum, með sýningum og verklegum æfingum. Kennslustjóri skal sjá um, að kennslan í einstökum greinum verði samhæfð heildinni eins og frekast verður við komið, meðal annars með upprifjun undirstöðugreina í tengslum við kennslu í klínískum greinum og samkennslu í þeim. Stúdentar, sem eru í verklegu námi á sjúkradeildum eða rannsóknarstofum, skulu sitja fræðslufundi þeirra. Enn fremur skulu stúdentar, sem lokið hafa prófi annars árs, sækja almenna fræðslufundi kennslusjúkrahúsanna.

Til almennrar læknakennslu teljast þessar greinar:

1. Inngangur að líffæra- og lífeðlisfræði.

Kennsla fer fram á fyrsta misseri fyrsta námsárs. Kennd verða grundvallaratriði líffærafræði og lífeðlisfræði. Próf verða í janúar, einkunn reiknast til læknisprófs.

2. Efnafræði ólífræn og lífræn.

Efnafræði. Kennsla er munnleg og verkleg á fyrsta námsári og er sameiginleg með kennslu í Verkfræði- og raunvísindadeild.

Efnafræði I, almenn efnafræði og efnagreining. Kennd eru grundvallaratriði almennrar efnafræði, þar með talin höfuðatriði eðlisefnafræðinnar, frumefnafræði, efnabreytingar og efnagreining. Kennsla þessi fer fram í september til janúar. Próf eru í janúar og eru skrifleg og verkleg. Einkunn reiknast til læknisprófs.

Efnafræði II, lífræn efnafræði. Kennsla í lífrænni efnafræði fer fram í janúar til maí. Kennd eru grundvallaratriði varðandi mikilvægustu flokka lífrænna efna, efnabreytingar þeirra og efnabreytingafræði. Gerð er grein fyrir þýðingu þessara atriða fyrir lífefnafræði, lífeðlisfræði og lyfjafræði. Próf eru í lok fyrsta námsárs og eru verkleg og skrifleg. Einkunn reiknast til læknisprófs.

Heimilt er að efna til 4—6 vikna sumarnámskeiðs og prófs að því loknu í efnafræði vegna þeirra stúdenta, sem hafa ónóga undirbúningsmenntun í efnafræði. Gera má þátttöku í prófinu að skilyrði, en einkunn útiloki ekki stúdenta frá áframhaldandi námi.

3. Eðlisfræði.

Eðlisfræði. Kennsla er munnleg og verkleg á fyrsta námsári. Farið er yfir þau atriði eðlisfræðinnar, sem mesta þýðingu hafa í líffræði og eru m. a. nauðsynleg undirstaða náms í lífeðlisfræði. Fjallað er um mælingar og tæki, sem notuð eru í læknisfræði.

Skriflegt próf er í lok kennsluárs með einkunn, sem reiknast til læknisprófs.

Heimilt er að efna til 4—6 vikna sumarnámskeiðs og prófs að því loknu í eðlisfræði og stærðfræði vegna þeirra stúdenta, sem hafa ónóga undirbúningsmenntun í eðlisfræði. Gera má þátttöku í prófinu að skilyrði, en einkunnir útiloki ekki stúdenta frá áframhaldandi námi.

4. Læknisfræðileg tölfræði.

Námskeið á 2. og 5. námsári. Kennslan fjallar um þau grundvallaratriði staðtölufraðinnar, sem sérstaklega snerta læknisfræði og mat á tölulegum niðurstöðum rannsókna, svo sem útreikninga á líkum, tíðni, dreifingu, meðalgildum, frávikum og samanburð á slíkum útreikningum.

Skriflegt próf með lágmarkseinkunn, sem ekki er reiknuð með til læknisprófs, er í lok hvers námskeiðs.

5. Erfðafræði.

Námskeið á 3. námsári. Kennslan fjallar um grundvallarlögmál erfðafræðinnar og þýðingu þeirra fyrir mannförðir, annars vegar eðlilegra eiginleika og hins vegar ýmissa afbrigða og sjúkdóma, sem verður fjallað um síðar í náminu.

Skriflegt próf með lágmarkseinkunn, sem ekki er reiknuð með til læknisprófs, er í lok námskeiðsins.

6. Líffærafræði.

Kennslan tekur til líffærafræði kerfa og svæða líkamans, vefjafræði og fósturfræði. Kennslan fer fram á seinna misseri, 1. árs, 2. námsári og á fyrra misseri 3. námsárs. Kennslan fjallar um gerð og form líkamans með nánu tilliti til starfsemi. Kennslan er munnleg og verkleg. Próf eru í lok hvers kennsluárs og í lok fyrra misseris 3. árs. Einkunnir reiknast til læknisprófs.

Kennsla í krufningum má fara fram að sumarlagi.

7. Lífefnafræði.

Kennslan er munnleg og verkleg á öðru námsári. Kennslan er um efnabyggingu líkamans og þær efnabreytingar, sem liggja til grundvallar vexti og viðhaldi hans. Próf eru í lok kennsluárs. Einkunn er reiknuð til læknisprófs.

8. Lífeðlisfræði.

Kennslan er munnleg og verkleg á öðru námsári, um störf, stjórn og sam-hæfingu allra vefja, líffæra og líffærakerfa. Próf er í lok kennsluárs. Einkunn er reiknuð til læknisprófs.

Leitast skal við að samræma kennsluna í líffærafræði, lífefnafræði og lífeðlisfræði.

9. Sálarfræði.

Kennslan er munnleg og fer fram í tengslum við kennslu í líffæra- og lífeðlisfræði taugakerfisins á öðru námsári. Farið er yfir helstu atriði þróun-arsálfræði, persónuleika, skynjun, nám, greind, tilfinningalíf og félagssál-fræði og byggt á því, sem kennt hefur verið með forspjallsvísindum. Próf með lágmarkseinkunn, sem reiknast ekki til læknisprófs, er í lok námskeiðs.

2. gr.

43. gr. orðist svo:

Próf í læknadeild.

Um almenn ákvæði um próf vísast til sjötta kafla reglugerðar um Háskóla Ís-lands.

Próf í læknadeild eru haldin að vori og hausti, sbr. þó 42. grein. Haustpróf eru eingöngu upptöku- og sjúkrapróf og skal lokið fyrir 15. september. Kennslu-nefnd getur þó í samráði við hlutaðeigandi kennara og deildarráð heimilað próf á öðrum tímum.

Próf skulu að jafnaði vera skrifleg, en geta einnig verið munnleg og verkleg. Skal leitast við að prófa sem víðast um námsefni. Kennslunefnd ákveður í samráði við hlutaðeigandi kennara, hvernig prófa skuli og skal það tilkynnt í upphafi kennsluárs.

Stúdent skal hafa lokið öllum prófum hvers árs, annað hvort að vori eða að hausti, áður en hann getur hafið nám á næsta námsári, en skal annars sitja fyrra árið aftur.

Próf í einstökum prófgreinum má ekki endurtaka nema einu sinni nema bæði deildarráð og kennslunefnd sjái lögmæta ástæðu til að veita undanþágu.

Einkunnir skal skrá í heilum og hálfum tölum frá 0—10.

Aðaleinkunn 9.0—10 er ágætiseinkunn, 7.5—8.5 er I. einkunn 6.0—7.00 er II. einkunn og 5.0—5.5 er III. einkunn.

Stúdent, sem nær ekki einkunn 5.0 á einhverju prófi, telst ekki hafa staðist það próf.

Árangur á prófum í lyflæknis- og handlæknisvitjun reiknast til lokaeinkunnar, og skal metinn á sama hátt og í munnlegum og skriflegum prófum.

Árangur stúdents í verklegu námi er metinn af þeim kennara, sem kennsluna annast. Kennari skilar skriflegum vitnisburði til skrifstofu Háskólans, og eru gefnar fjórar einkunnir: 1. ágætt, 2. gott, 3. sæmilegt og 4. slæmt. Sá, sem hlýtur einkunnina slæmt, telst ekki hafa lokið verklega náminu og getur ekki sagt sig til prófs. Einkunnir fyrir verklegt nám eru skráðar á prófskirteini, en reiknast ekki með til lokaeinkunnar.

Einkunnir í eftirtöldum greinum teljast til aðaleinkunnar við læknispróf:

Inngangur að líffæra- og lífeðlisfræði	$\frac{1}{2}$
Efnafræði I, almenn efnafræði og efnagreining	$\frac{1}{2}$
Efnafræði II, lífræn efnafræði	$\frac{1}{2}$
Eðlisfræði	$\frac{1}{2}$
Líffærafræði	$1\frac{1}{2}$
Lífefnafræði	1
Lífeðlisfræði	1
Líffærameinafræði	1
Lyja- og eiturefnafræði	1
Sýkla- og ónæmisfræði	$\frac{1}{2}$
Handlæknisfræði	3
Lyflæknisfræði	3
Svæfingafraði	$\frac{1}{2}$
Augnsjúkdómafræði	$\frac{1}{3}$
Geislalæknisfræði	$\frac{1}{2}$
Háls-, nef- og eyrnasjúkdómafræði	$\frac{1}{3}$
Húð- og kynsjúkdómafræði	$\frac{1}{3}$
Barnasjúkdómafræði	1
Geðsjúkdómafræði	1
Kvensjúkdóma- og fæðingafraði	1
Taugasjúkdómafræði	$\frac{1}{2}$
Heimilislæknisfræði	1
Heilbrigðisfræði	1
Félagslæknisfræði	$\frac{1}{3}$
Réttarlæknisfræði	$\frac{1}{3}$
Endurhæfingarfræði	$\frac{1}{3}$

Samtals $22\frac{1}{2}$ einkunn

Deildarráði er heimilt að fengnum tillögum kennslunefndar að breyta hlutfallstölum einkunna, enda sé það tilkynnt í upphafi kennsluárs.

Nái stúdent ekki tilskilinni einkunn í einhverju prófi, má hann þreyta það próf aftur að hausti eða vori, enda séu ákvæði um heildarnámstíma því ekki til fyrirstöðu.

Meira en 8 ár mega ekki liða frá skrásetningu til lokaprófs, nema með sérstöku leyfi deildarinnar, þ. e. deildarráðs og kennslunefndar.

3. gr.

50. gr. I., þar sem taldar eru kennslugreinar í viðskiptadeild, breytist þannig, að inn í upptalninguna bætast þrír nýir liðir, tölusettir sem hér segir:

4.9. Þjóðhagsreikningar og þjóðhagsáætlanir.

6.2. Markaðsboðmiðlun.

6.3. Stefnumótun fyrirtækja.

Tölusetning þeirra liða, sem fyrir eru, breytist þannig, að liðir 4.9.—6.0. verða 5.0.—6.1 og liðir 6.1.—6.3. verða 6.4.—6.6.

4. gr.

108. gr. orðist svo:

Skylt er stúdentum að ljúka undirbúningsnámskeiðum í félagsfræði, stjórnmálafræði, tölfraði og forspjalli að þjóðfélagsvísindum. Auk þess skulu stúdentar ljúka tilteknum námskeiðum í sálarfræði og hagfræði.

Námsstjórn ákveður nánar námsmagn hvers námskeiðs. Stefnt skal að því, að nám á undirbúningsnámskeiðunum sé sem mest sameiginlegt öllum stúdentum í almennum þjóðfélagsfræðum.

Stúdent skal hafa lokið undirbúningsnámskeiðum í þeim greinum, sem taldar eru í 1. mgr., innan þriggja missera frá skrásetningu. Heimilt er þó að ljúka síðar öðru hvoru námskeiðinu í sálarfræði og hagfræði. Ef út af bregður, skal má nafn hans af stúdentaskrá námsbrautarinnar, nema alveg sérstaklega standi á, enda er þá námsstjórn heimilt að veita undanþágu.

5. gr.

Reglugerðarbreyting þessi tekur gildi frá 1. janúar 1974 að telja.

Í menntamálaráðuneytinu, 16. janúar 1974.

Magnús T. Ólafsson.

Árni Gunnarsson.